



ს დ ა ს უ

შპს საქართველოს დავით აღმაშენებლის სახელობის
უნივერსიტეტი

დამტკიცებულია

“___” _____ 2018 წ.

ბიზნესისა და სოციალურ მეცნიერებათა სკოლა

სადისერტაციო საბჭოსა და დოქტორანტურის

დ ე ბ უ ლ ე ბ ა

შპს საქართველოს დავით აღმაშენებლის სახელობის უნივერსიტეტის ბიზნესისა და სოციალურ მეცნიერებათა სკოლის სადისერტაციო საბჭოსა და დოქტორანტურის

დ ე ბ უ ლ ე ბ ა

თავი I. სადისერტაციო საბჭო

მუხლი 1. შპს საქართველოს დავით აღმაშენებლის სახელობის უნივერსიტეტის ეკონომიკის დოქტორის აკადემიური ხარისხის მიმნიჭებელი ორგანო

- 1.1 შპს საქართველოს დავით აღმაშენებლის სახელობის უნივერსიტეტის (შემდგომში: “სდასუ”) ეკონომიკის დოქტორის აკადემიური ხარისხის მიმნიჭებელი ორგანო არის სდასუს ბიზნესისა და სოციალურ მეცნიერებათა სკოლის სადისერტაციო საბჭო (შემდგომში: “სადისერტაციო საბჭო”).
- 1.2 სადისერტაციო საბჭო საქმიანობას წარმართავს აკადემიური ავტონომიურობის პრინციპზე დაყრდნობით.
- 1.3 სადისერტაციო საბჭო მოქმედებს საქართველოს კანონმდებლობის, უმაღლესი განათლების ევროპული სივრცის მარეგულირებელი საერთაშორისო ხელშეკრულებების, შეთანხმებების, დეკლარაციების კონვენციებისა და კომუნიკაციების, აგრეთვე სდასუს დებულების, სდასუს დოქტორანტურის სტანდარტის, ეთიკის კოდექსის, შინაგანაწესის, სასწავლო პროცესის რეგულირების წესის, ბიზნესისა და სოციალურ მეცნიერებათა სკოლის დებულებისა და სადისერტაციო საბჭოსა და დოქტორანტურის წინამდებარე დებულების საფუძველზე.

მუხლი 2. სადისერტაციო საბჭოს ძირითადი მიზნები

- 2.1 სადისერტაციო საბჭოს ძირითადი მიზნებია:
 - ა) სამეცნიერო საქმიანობის უნარის მქონე პირების გამოვლენა და მათი ინტელექტუალური პოტენციალის რეალიზება, შემოქმედებითი უნარ-ჩვევების განვითარება და თანამედროვე მოთხოვნების შესატყვისი კომპეტენციის მქონე და კონკურენტუნარიანი სამეცნიერო და პედაგოგიური კადრების მომზადება;
 - ბ) თანამედროვე სტანდარტების შესაბამისი და მომავალზე ორიენტირებული სადოქტორო საგანმანათლებლო პროგრამის რეალიზება და დოქტორანტებისთვის სათანადო პირობების შექმნა დამოუკიდებელი კვლევების საწარმოებლად;
 - გ) განათლების ევროპულ სივრცეში და მსოფლიო სამეცნიერო საზოგადოებაში ინტეგრაცია, დოქტორანტთა მობილობის წახალისება.

მუხლი 3. სადისერტაციო საბჭოს უფლებამოსილება

- 3.1 სადისერტაციო საბჭო:
 - ა) სადისერტაციო საბჭოს შემადგენლობიდან, პირდაპირი და თანასწორი არჩევნების საფუძველზე, ღია კენჭისყრით, სიითი შემადგენლობის არანაკლებ 2/3-ით, ირჩევს სადისერტაციო საბჭოს თავმჯდომარეს;
 - ბ) სადისერტაციო საბჭოს თავმჯდომარის წარდგინებით, სადისერტაციო საბჭოს წევრებიდან ირჩევს სადისერტაციო საბჭოს სწავლულ მდივანს ღია კენჭისყრით, სიითი შემადგენლობის უმრავლესობით;
 - გ) განიხილავს და წყვეტს სადისერტაციო საბჭოს წევრის უფლებამოსილების შეწყვეტისა და შეჩერების საკითხს;
 - დ) შეიმუშავებს დოქტორანტურაში ჩარიცხვის კრიტერიუმებს;
 - ე) განსაზღვრავს სპეციფიკური დარგობრივი/დარგთაშორისი სასწავლო კურსებს;
 - ვ) განსაზღვრავს რეცენზირებად/რეფერირებად სამეცნიერო გამოცემათა ჩამონათვალს, რომელშიც სასურველია დოქტორანტმა გამოაქვეყნოს სამეცნიერო ნაშრომი;
 - ზ) იხილავს და ამტკიცებს სადისერტაციო თემებს;
 - თ) ამტკიცებს დოქტორანტის სამეცნიერო ხელმძღვანელს ან ხელმძღვანელს და თანახელმძღვანელს;

- ი) წყვეტს სადისერტაციო თემისა და დოქტორანტის სამეცნიერო ხელმძღვანელის, სამეცნიერო თანახელმძღვანელის შეცვლის საკითხებს;
 - კ) იღებს გადაწყვეტილებას დოქტორანტისთვის დოქტორანტის სტატუსის შეწყვეტის თაობაზე;
 - ლ) ანიჭებს სდასუ-ს ეკონომიკის დოქტორის აკადემიურ ხარისხს;
 - მ) აკადემიური პატიოსნების ნორმების დარღვევის შემთხვევაში, იღებს გადაწყვეტილებას ეკონომიკის დოქტორის აკადემიური ხარისხის ჩამორთმევის შესახებ;
 - ნ) აკადემიურ საბჭოს წარუდგენს აღიარებულ მეცნიერს სდასუ-ს ეკონომიკის საპატიო დოქტორის წოდების მისანიჭებლად;
 - ო) ისმენს სადისერტაციო საბჭოს თავმჯდომარის ანგარიშს გაწეული მუშაობის შესახებ, არაუგვიანეს ერთი თვისა სსსწავლო წლის დაწყებიდან ან, საჭიროებისამებრ, ნებისმიერ დროს, სადისერტაციო საბჭოს წევრთა სიითი შემადგენლობის არანაკლებ 1/3-ის მოთხოვნით;
- 3.2 ახორციელებს საქართველოს კანონმდებლობით და სდასუ-ს დებულებით მისთვის მინიჭებულ სხვა უფლებამოსილებებს.

მუხლი 4. სადისერტაციო საბჭოს შემადგენლობა

- 4.1. ბიზნესისა და სოციალურ მეცნიერებათა სკოლის სადისერტაციო საბჭო შედგება სკოლის ყველა პროფესორის და ასოცირებული პროფესორისაგან.
- 4.2. სადისერტაციო საბჭოს გადაწყვეტილებით, საბჭოს შემადგენლობაში შეიძლება არჩეულ იქნენ დოქტორის აკადემიური ხარისხის მქონე სხვა პირები.

მუხლი 5. სადისერტაციო საბჭოს თავმჯდომარე

- 5.1 სადისერტაციო საბჭოს მიმდინარე საქმიანობას წარმართავს და ახორციელებს სადისერტაციო საბჭოს თავმჯდომარე.
- 5.2. სადისერტაციო საბჭოს თავმჯდომარე აირჩევა სამი წლის ვადით.
- 5.3 სადისერტაციო საბჭოს თავმჯდომარის კანდიდატურის დასახელების უფლება აქვს სადისერტაციო საბჭოს წევრს.
- 5.4 სადისერტაციო საბჭოს თავმჯდომარე არ შეიძლება იმავდროულად იყოს ბიზნესისა და სოციალურ მეცნიერებათა სკოლის დეკანი.
- 5.5 სადისერტაციო საბჭოს თავმჯდომარე:
 - ა) უზრუნველყოფს სადისერტაციო საბჭოს ორგანიზაციულ საქმიანობას;
 - ბ) ანგარიშვალდებულია სადისერტაციო საბჭოს წინაშე;
 - გ) წარმოადგენს სადისერტაციო საბჭოს სდასუს აკადემიური საბჭოსა და რექტორის, სხვა უმაღლესი საგანმანათლებლო და სამეცნიერო-კვლევითი დაწესებულებების წინაშე;
 - დ) თავმჯდომარეობს სადისერტაციო საბჭოს სხდომებს;
 - ე) სადისერტაციო საბჭოს სახელით ნიშნავს დისერტაციის ოპონენტებს;
 - ვ) სადისერტაციო საბჭოს სახელით ნიშნავს დისერტაციის დაცვას;
 - ზ) სადისერტაციო საბჭოს სახელით, ხელს აწერს შესაბამის დოკუმენტებს.
- 5.6. სადისერტაციო საბჭოს თავმჯდომარის მიერ უფლებამოსილების შესრულების შეუძლებლობის შემთხვევაში სადისერტაციო საბჭოს საქმიანობას წარმართავს თავმჯდომარის ან საბჭოს მიერ შერჩეული საბჭოს ერთ-ერთი წევრი.

მუხლი 6. სადისერტაციო საბჭოს სწავლული მდივანი

- 6.1 სადისერტაციო საბჭოს საქმიანობის ორგანიზაციულ უზრუნველყოფას და საქმისწარმოებას ახორციელებს სადისერტაციო საბჭოს სწავლული მდივანი.
- 6.2 სადისერტაციო საბჭოს სწავლული მდივანი:
 - ა) უზრუნველყოფს სადისერტაციო საბჭოს სახელზე შემოსული დისერტაციების და პუბლიკაციების, აგრეთვე წერილებისა და დოკუმენტების აღრიცხვა-შენახვას;
 - ბ) ამზადებს წერილებისა და სადისერტაციო საბჭოს სხდომაზე განსახილველი საკითხების პროექტებს;
 - გ) ამზადებს სადისერტაციო საბჭოს სხდომებს;

- დ) უზრუნველყოფს ინფორმაციის გავრცელებას;
- ე) პასუხისმგებელია სადისერტაციო ნაშრომის სტრუქტურისა და ფორმალური სტანდარტების დაცვაზე;
- ვ) აწარმოებს სადისერტაციო საბჭოს არქივს.

მუხლი 7. სადისერტაციო საბჭოს წევრის უფლებამოსილების შეჩერება

- 7.1. სადისერტაციო საბჭოს წევრს უფლებამოსილება შეუჩერდება ისეთი მნიშვნელოვანი გარემოების არსებობისას, რაც ერთი სემესტრის განმავლობაში შეუძლებელს ხდის მის მონაწილეობას სადისერტაციო საბჭოს სხდომებში.
- 7.2. სადისერტაციო საბჭოს წევრის უფლებამოსილების შეჩერების თაობაზე გადაწყვეტილებას იღებს სადისერტაციო საბჭო.

მუხლი 8. სადისერტაციო საბჭოს წევრის უფლებამოსილების შეწყვეტა

- 8.1 სადისერტაციო საბჭოს წევრს უფლებამოსილება შეუწყდება:
 - ა) სდასუ-ს აკადემიური თანამდებობიდან გათავისუფლების შედეგად;
 - ბ) სასამართლოს მიერ ქმედუუნაროდ, უგზო-უკვლოდ ან გარდაცვლილად ცნობის შემთხვევაში;
 - გ) მის მიმართ სასამართლოს მიერ გამოტანილი გამამტყუნებელი განაჩენის კანონიერ ძალაში შესვლის შედეგად.
- 8.2 ამ მუხლის პირველი პუნქტით გათვალისწინებული საფუძვლების არსებობის შემთხვევაში, სადისერტაციო საბჭოს წევრის უფლებამოსილების შეწყვეტის თაობაზე გადაწყვეტილებას იღებს სადისერტაციო საბჭო.
- 8.3 ამ დებულების მე-4 მუხლის მე-4.2 პუნქტში მითითებული პირების უფლებამოსილების შეწყვეტის საკითხს, სადისერტაციო საბჭოს თავმჯდომარის წარდგინებით, წყვეტს სადისერტაციო საბჭო.

მუხლი 9. სადისერტაციო საბჭოს სხდომების ჩატარების პერიოდულობა

- 9.1. სადისერტაციო საბჭოს სხდომები ტარდება საჭიროებისამებრ, მაგრამ არანაკლებ სემესტრში ერთხელ მაინც.
- 9.2 სადისერტაციო საბჭოს თავმჯდომარე სადისერტაციო საბჭოს სხდომას იწვევს საკუთარი ინიციატივით, დეკანის, სადისერტაციო საბჭოს სწავლული მდივნის, სადოქტორო პროგრამის ხელმძღვანელის ან სადისერტაციო საბჭოს არანაკლებ სამი წევრის მოთხოვნით.

მუხლი 10. სხდომების ჩატარებისა და გადაწყვეტილების მიღების წესი

- 10.1 სადისერტაციო საბჭოს სხდომებს ესწრებიან სადისერტაციო საბჭოს წევრები.
- 10.2 საჭიროებიდან გამომდინარე სადისერტაციო საბჭოს მიერ მოწვეულ პირებს უფლება აქვთ დაესწრონ სხდომებს სათათბირო ხმის უფლებით.
- 10.3 დაინტერესებულ პირთა მხრიდან სადისერტაციო საბჭოს სხდომაზე დასწრების სურვილის შემთხვევაში, სხდომაზე ან მის ნაწილზე დაშვების თაობაზე გადაწყვეტილებას იღებს სადისერტაციო საბჭო.
- 10.4 სადისერტაციო საბჭოს სხდომა გადაწყვეტილებაუნარიანია, თუ მასში მონაწილეობს სადისერტაციო საბჭოს წევრთა სიითი შემადგენლობის უმრავლესობა.
- 10.5 თუ წინამდებარე დებულებით სხვა წესი არ არის დადგენილი, სადისერტაციო საბჭოს გადაწყვეტილებები მიიღება სხდომაზე დამსწრეთა ხმების უმრავლესობით. ხმების თანაბრად განაწილების შემთხვევაში გადამწყვეტია სადისერტაციო საბჭოს თავმჯდომარის ხმა.
- 10.6 სადისერტაციო საბჭოს წევრის უფლებამოსილების შეჩერების შემთხვევაში, სადისერტაციო საბჭოს გადაწყვეტილების მიღებისთვის აუცილებელი ხმების რაოდენობა იანგარიშება სადისერტაციო საბჭოს სიითი შემადგენლობიდან უფლებამოსილებაშეჩერებულ წევრთა რიცხვის გამოკლებით.

მუხლი 11. სადისერტაციო საბჭოს სხდომის ოქმი

- 11.1 სადისერტაციო საბჭოს წევრთა შეკრებისა და სხდომის ჩატარების, აგრეთვე გადაწყვეტილების მიღების ფაქტზე დგება სხდომის ოქმი, რომელსაც ხელს აწერს სადისერტაციო საბჭოს თავჯდომარე და სწავლული მდივანი.
- 11.2 სადისერტაციო საბჭოს სხდომების ოქმები ინახება სწავლული მდივნის მიერ, არანაკლებ 3 წლის განმავლობაში, რის შემდეგ გადაეცემა სდასუ-ს არქივს.

თავი II დოქტორანტურა

მუხლი 12. დოქტორანტურის სტატუსი

- 12.1 სდასუ-ს ბიზნესისა და სოციალურ მეცნიერებათა სკოლის დოქტორანტურა (შემდგომში “დოქტორანტურა”) არის უმაღლესი აკადემიური განათლების მესამე საფეხური, რომელიც მიზნად ისახავს ეკონომიკის მიმართულებით სამეცნიერო კადრის მომზადებას და მთავრდება ეკონომიკის დოქტორის აკადემიური ხარისხის მინიჭებით.
- 12.2 დოქტორანტურაში სწავლა მიმდინარეობს სდასუ-ს აკადემიური საბჭოს მიერ დამტკიცებული ეკონომიკის სადოქტორო პროგრამის ფარგლებში.
- 12.3 დოქტორანტურაში სწავლის დასრულების შემდეგ დისერტაციის დაცვა და დოქტორანტისთვის ეკონომიკის დოქტორის აკადემიური ხარისხის მინიჭება ხორციელდება წინამდებარე დებულებით განსაზღვრული წესით.

მუხლი 13. ეკონომიკის სადოქტორო პროგრამა

- 13.1 ეკონომიკის სადოქტორო პროგრამას ხელმძღვანელის წარდგინებით იხილავს და ამტკიცებს ბიზნესისა და სოციალურ მეცნიერებათა სკოლის საბჭო.
- 13.2 სადოქტორო პროგრამის ხელმძღვანელი შეიძლება იყოს როგორც სდასუ-ს პროფესორი ან ასოცირებული პროფესორი, ისე სადისერტაციო საბჭოს შემადგენლობაში არჩეული წევრი. სადოქტორო პროგრამის ხელმძღვანელს ევალება პროგრამის განხორციელებასთან დაკავშირებული საორგანიზაციო საკითხების მოგვარება, სამეცნიერო ხელმძღვანელთან ან სამეცნიერო ხელმძღვანელთან და თანახელმძღვანელთან ერთად დოქტორანტებისათვის კონსულტაციის გაწევა ინდივიდუალური პროფილის ოპტიმალურად ფორმირების მიზნით, დოქტორანტების აკადემიური და კვლევითი საქმიანობის მონიტორინგი და სხვ.;
- 13.3 სადოქტორო პროგრამის შემადგენელი ნაწილია პროგრამის სასწავლო გეგმა, სადაც აისახება სადოქტორო პროგრამის სასწავლო და კვლევითი კომპონენტები და მათი თანაფარდობა, სასწავლო კომპონენტების ცალკეული ელემენტები, აგრეთვე ამ ელემენტების მიხედვით კრედიტების დაგროვების ფარგლები.
- 13.4 სადოქტორო პროგრამის განხორციელებაში მონაწილეობენ:
 - ა) სდასუ-ს პროფესორები და ასოცირებული პროფესორები;
 - ბ) სკოლის სადისერტაციო საბჭოს წევრებად არჩეული ან სდასუ-ში მოწვეული ეკონომიკის დოქტორები ან მასთან გათანაბრებული სამეცნიერო ხარისხის მქონე პირები ან რელევანტური დარგების სამეცნიერო ხარისხის მქონე პირები;
 - გ) პარტნიორი საგანმანათლებლო ან სამეცნიერო-კვლევითი დაწესებულებების მეცნიერები.
- 13.5 სადოქტორო პროგრამა განთავსდება სდასუ-ს ვებ-გვერდზე.

მუხლი 14. სადოქტორო საკვლევი თემები და ინდივიდუალური საგანმანათლებლო პროგრამები

- 14.1 დოქტორანტურაში ჩარიცხვა წინასწარ შერჩეული სადისერტაციო თემითა და სავარაუდო ხელმძღვანელის წინასწარი თანხობის გარდა, შესაძლებელია სადოქტორო საკვლევი თემების მიხედვით გამოცხადებული კონკურსის საფუძველზე.
- 14.2 სადისერტაციო საბჭო წინასწარ აცხადებს სადოქტორო საკვლევ თემებს და სთავაზობს მათ დოქტორანტურაში სწავლის მსურველებს.

- 14.3 სადოქტორო საკვლევითი თემები შემუშავდება ეკონომიკის ცალკეული სპეციალობის მიხედვით, სადისერტაციო საბჭოს წევრის ან წევრთა ჯგუფის მიერ. სადოქტორო საკვლევითი თემის აქტუალობა და სიახლე, მისი მნიშვნელობა ეკონომიკური მეცნიერების განვითარებისთვის უნდა დასაბუთდეს წერილობით.
- 14.4 სადოქტორო საკვლევითი თემებს იხილავს და ამტკიცებს სადისერტაციო საბჭო, რომელიც შემდგომ შეიმუშავებს საკვლევითი თემების შესაბამის ინდივიდუალურ საგანმანათლებლო პროგრამებს და დასამტკიცებლად წარუდგენს სდასუს აკადემიურ საბჭოს.
- 14.5 სადისერტაციო საბჭოს მიერ დამტკიცებული სადოქტორო საკვლევითი თემები და აკადემიური საბჭოს მიერ დამტკიცებული ინდივიდუალური საგანმანათლებლო პროგრამები განთავსდება სდასუს ვებ-გვერდზე.
- 14.6 სადოქტორო საკვლევითი თემების მიხედვით ჩატარებული კონკურსის გზით ჩარიცხულ დოქტორანტს სადისერტაციო თემა და ხელმძღვანელი დაუმტკიცდება არაუგვიანეს ორი კვირისა ჩარიცხვიდან.

მუხლი 15. სადოქტორო პროგრამის აღწერილობა

- 15.1 სადოქტორო პროგრამა შედგება სასწავლო და კვლევითი კომპონენტისაგან და სრულდება სადისერტაციო ნაშრომის შესრულებითა და დაცვით. დოქტორანტის მიერ დახარჯული დროის (საათების) შეფასება ხორციელდება ევროპული კრედიტების ტრანსფერის სისტემით (ECTS).
- 15.2 სადოქტორო პროგრამა მოიცავს 180 კრედიტს. სასწავლო კომპონენტის მოცულობა განისაზღვრება 60 კრედიტით, ხოლო კვლევითი კომპონენტის (სადისერტაციო ნაშრომი) 120 კრედიტით.
- 15.3 საქართველოს უმაღლეს საგანმანათლებლო დაწესებულებებში მიღებული კრედიტების აღიარებას, დოქტორანტის სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის შუამდგომლობით, ახდენს რექტორის ბრძანებით შექმნილი კომისია.
- 15.4 უცხოეთის უმაღლეს საგანმანათლებლო დაწესებულებებში მიღებული კრედიტების აღიარება რეგულირდება საქართველოს კანონმდებლობით დადგენილი წესით.

მუხლი 16. სადოქტორო პროგრამის სასწავლო კომპონენტი

- 16.1 სადოქტორო პროგრამის სასწავლო კომპონენტი მიზნად ისახავს დოქტორანტის დარგობრივ და მეთოდოლოგიურ დახელოვნებას, აცნობს დოქტორანტს სამეცნიერო სიახლეებს ეკონომიკის ცალკეული სპეციალობების მიხედვით, უქმნის მყარ თეორიულ საწინდარს დამოუკიდებელი კვლევების წარმოებისთვის, ხელს უწყობს სადისერტაციო ნაშრომის შესრულებაში, ამზადებს მას მომავალი აკადემიური და სამეცნიერო საქმიანობისათვის.
- 16.2 სადოქტორო პროგრამის სასწავლო კომპონენტი შედგება სავალდებულო და არჩევითი ელემენტებისაგან.
- 16.3 სადოქტორო პროგრამის სასწავლო კომპონენტის ძირითადი სავალდებულო ელემენტია სასწავლო კურსები. ცალკეული სასწავლო კურსები სადოქტორო პროგრამაში შეიძლება შევიდეს არჩევითი ელემენტის სახითაც.
- 16.4 სადოქტორო პროგრამის სასწავლო კომპონენტში სავალდებულო და/ან არჩევითი ელემენტად შეიძლება შევიდეს: ძირითადი მეცნიერული და პედაგოგიური უნარების განმავითარებელი სასწავლო კურსები (ეკონომიკური კვლევის მეთოდები, მეცნიერების მენეჯმენტი, კურიკულუმის ფორმირების თანამედროვე მეთოდები, სწავლების თანამედროვე მეთოდები და სხვა).
- 16.5 სადოქტორო პროგრამის სასწავლო კომპონენტის არჩევითი ელემენტია სპეციფიკური დარგობრივი (კვლევის თემის შესაბამისი) სასწავლო კურსები, რომლებსაც ატარებენ შესაბამისი დარგის სპეციალისტები. დარგობრივი სასწავლო კურსების ფარგლებში ხდება ეკონომიკის შესაბამისი სპეციალობის მიხედვით პრობლემებისა და სამეცნიერო მიღწევების განხილვა, ახალი სამეცნიერო ლიტერატურისა და პუბლიკაციების ანალიზი, დისკუსია აქტუალურ საკითხებზე და სხვ.
- 16.6 სასწავლო კომპონენტის სავალდებულო ელემენტი – პროფესორის ასისტენტობა, გულისხმობს სხვადასხვა სასწავლო კურსების მსვლელობისას პროფესორის ასისტენტის მოვალეობის დროებით შესრულებას. პროფესორის ასისტენტობის შუალედური შეფასება ხდება დოქტორანტის ხელმძღვანელის ან სხვა პროფესორის მიერ, რომელსაც დოქტორანტი გაუწევს ასისტენტობას. დასკვნითი შეფასება (საჯარო ლექცია) ხორციელდება სადოქტორო პროგრამის ხელმძღვანელის მიერ (დანართი N 4).

- 16.7. დოქტორანტის საგანმანათლებლო პროგრამის სასწავლო კომპონენტის ყველა აქტივობის შუალედური შეფასებების მინიმალური კომპეტენციის ზღვარია 21 ქულა, დასკვნითი გამოცდის მინიმალური კომპეტენციის ზღვარი კი, დასკვნითი გამოცდის მაქსიმალური შეფასების 50 პროცენტი.
- 16.8. დოქტორანტურის საგანმანათლებლო პროგრამის სასწავლო კომპონენტის სავალდებულო და არჩევითი ელემენტების შეფასების სისტემა უშვებს:

ხუთი სახის დადებით შეფასებას:

- (A) ფრიადი - შეფასების 91-100 ქულა;
- (B) ძალიან კარგი - მაქსიმალური შეფასების 81-90 ქულა;
- (C) კარგი - მაქსიმალური შეფასების 71-80 ქულა;
- (D) დამაკმაყოფილებელი - მაქსიმალური შეფასების 61-70 ქულა;
- (E) საკმარისი - მაქსიმალური შეფასების 51-60 ქულა.

ორი სახის უარყოფით შეფასებას:

- (FX) ვერ ჩააბარა - მაქსიმალური შეფასების 41-50 ქულა, რაც ნიშნავს, რომ სტუდენტს ჩასაბარებლად მეტი მუშაობა სჭირდება და ეძლევა დამოუკიდებელი მუშაობით დამატებით გამოცდაზე, სასემინარო ნაშრომის შემთხვევაში-პრეზენტაციაზე, ხოლო პროფესორის ასისტენტობის შემთხვევაში -საჯარო ლექციაზე ერთხელ გასვლის უფლება.
- (F) ჩაიჭრა - მაქსიმალური შეფასების 40 ქულა და ნაკლები, რაც ნიშნავს, რომ სტუდენტის მიერ ჩატარებული სამუშაო არ არის საკმარისი და მას სასწავლო კურსი ახლიდან აქვს შესასწავლი; პროფესორის ასისტენტობის შემთხვევაში ეს აქტივობა თავიდან უნდა შეასრულოს; სასემინარო ნაშრომის შემთხვევაში დოქტორანტმა ახალი სასემინარო ნაშრომი უნდა მოამზადოს და წარმოადგინოს.

16.9. უნივერსიტეტი უფლებამოსილია, საგანმანათლებლო მიზნებიდან გამომდინარე დოქტორანტურის საგანმანათლებლო პროგრამის სასწავლო კომპონენტის ფარგლებში განახორციელოს სწავლება-სწავლის პროცესი არასრული დატვირთვით.

16.10. სასწავლო კომპონენტის ფარგლებში სწავლება-სწავლის არასრული დატვირთვის რეჟიმი ნიშნავს დოქტორანტის სასწავლო დატვირთვას კვირაში დამოუკიდებელი და საკონტაქტო საათების ჯამური მოცულობით არაუმეტეს 25 საათისა.

მუხლი 17. სადოქტორო პროგრამის კვლევითი კომპონენტი

- 17.1. სადოქტორო პროგრამის კვლევითი კომპონენტი მიზნად ისახავს დოქტორანტის პროფესიულ დახელოვნებას, დამოუკიდებელ მკვლევარად ჩამოყალიბებას, განათლების ევროპულ სივრცესა და საერთაშორისო სამეცნიერო საზოგადოებაში ინტეგრაციას და მომავალი აკადემიური და სამეცნიერო საქმიანობისათვის მყარი საწინდარის შექმნაში.
- 17.2. სადოქტორო პროგრამის კვლევით კომპონენტს შეადგენს სადისერტაციო ნაშრომის მომზადება და დაცვა (120 კრედიტი). დისერტაციაზე დოქტორანტი მუშაობს დოქტორანტურაში ჩარიცხვიდან 6 სემესტრის განმავლობაში. იმ შემთხვევაში თუ დოქტორანტი დადგენილ ვადაში ვერ მოასწრებს სადისერტაციო ნაშრომის წარმოდგენას, მას უფლება აქვს დამატებით გაიგრძელოს სემესტრი, მაგრამ არაუმეტეს 4 სემესტრისა.
- 17.3. სადისერტაციო ნაშრომი უნდა პასუხობდეს წინამდებარე დებულების 29-ე მუხლის მოთხოვნებს.
- 17.4. სადისერტაციო ნაშრომის დაცვის პირობები განხორციელდება 32- 35-ე მუხლების შესაბამისად.
- 17.5. სადისერტაციო ნაშრომი უნდა შეფასდეს იმავე ან მომდევნო სემესტრში, რომელშიც სტუდენტი დაასრულებს მასზე მუშაობას.
- 17.6. სადისერტაციო ნაშრომის შეფასება განხორციელდება ერთჯერადად (დასკვნითი შეფასებით) დანართი #5 შესაბამისად.

17.7 სადოქტორო პროგრამით გათვალისწინებული კვლევითი კომპონენტის მიმდინარეობის შესახებ დოქტორანტი სამეცნიერო ხელმძღვანელთან ან ხელმძღვანელთან და თანახელმძღვანელთან ერთად სემესტრში ერთხელ ანგარიშს წარუდგენს სადისერტაციო საბჭოს.

მუხლი 18. დოქტორანტის ინდივიდუალური (სასწავლო და კვლევითი) გეგმა

18.1 დოქტორანტის ინდივიდუალური (სასწავლო და კვლევითი) გეგმა (შემდგომში „ინდივიდუალური გეგმა“) დგება დოქტორანტურაში ჩარიცხვიდან არაუგვიანეს ერთი თვის განმავლობაში, სამეცნიერო ხელმძღვანელთან ან სამეცნიერო ხელმძღვანელთან და თანახელმძღვანელთან და სადოქტორო პროგრამის ხელმძღვანელთან შეთანხმებით.

18.2 დოქტორანტის ინდივიდუალური გეგმა იქმნება სადოქტორო პროგრამით შემოთავაზებული სასწავლო კომპონენტიდან სასურველი ელემენტების შესარჩევად და აუცილებელი კრედიტების დაგროვების სავარაუდო გრაფიკის დასადგენად, აგრეთვე კონკრეტული კვლევითი აქტივობების განსახორციელებლად.

18.3 დოქტორანტის ინდივიდუალურ (სასწავლო და კვლევითი) გეგმაში აისახება სდასუ-ს აკადემიური საბჭოს მიერ დამტკიცებული სადოქტორო პროგრამის სასწავლო კომპონენტების ფარგლებში სავალდებულო და არჩევითი ელემენტების შემადგენლობა, დოქტორანტის მიერ სასწავლო კომპონენტების დასაძლევად შესასრულებელი სამუშაოს (კრედიტების მოპოვების) სემესტრების მიხედვით გაწერილი სავარაუდო გრაფიკი. მასში, აგრეთვე მოცემული უნდა იყოს განსახორციელებელი სადისერტაციო კვლევის მიზანი და სავარაუდო შედეგები, სადისერტაციო თემის აქტუალობა, სიახლე და მნიშვნელობა, სადისერტაციო ნაშრომის სავარაუდო სტრუქტურა და შესრულების სავარაუდო გრაფიკი (დანართი 3).

18.4 დოქტორანტის ინდივიდუალურ გეგმას განიხილავს და ამტკიცებს სადისერტაციო საბჭო.

მუხლი 19. დოქტორანტურაში სწავლის უფლება

19.1 ბიზნესისა და სოციალურ მეცნიერებათა სკოლის დოქტორანტურაში სწავლის უფლება აქვს არანაკლებ მაგისტრის ან მასთან გათანაბრებული აკადემიური ხარისხის მქონე პირს,

19.2 დოქტორანტურაში სწავლის უფლება შეუძლია მოიპოვოს სხვა უმაღლესი საგანმანათლებლო დაწესებულების ეკონომიკის სადოქტორო პროგრამის სტუდენტმა გარე მობილობის საფუძველზე.

19.3 „უმაღლესი განათლების შესახებ“ საქართველოს კანონის 50-ე მუხლის თანახმად, უცხოეთის უმაღლესი საგანმანათლებლო დაწესებულების შესაბამისი პროფილის მქონე პროგრამის კურსდამთავრებულს.

მუხლი 20. დოქტორანტურაში ჩარიცხვის წინაპირობები

20.1 სადოქტორო პროგრამის ან სადისერტაციო თემის სავარაუდო ხელმძღვანელის დასაბუთებული შუამდგომლობა და დოქტორანტობის კანდიდატთა შესარჩევ კონკურსში გამარჯვება.

20.2 დოქტორანტობის კანდიდატს მოეთხოვება უცხოური ენის (ინგლისური ენის) B2 დონეზე ცოდნა, რაც დგინდება სერტიფიკატის წარმოდგენით ან გამოცდის ჩაბარებით.

20.3 დოქტორანტობის კანდიდატი, რომელსაც ქართულენოვან პროგრამაზე სურს სწავლა და მისი მშობლიური ენა არ არის ქართული, მოეთხოვება აგრეთვე ქართული ენის B2 დონეზე ცოდნა, რაც დგინდება სერტიფიკატის წარმოდგენით ან გამოცდის ჩაბარებით ქართულ ენაში.

მუხლი 21. დოქტორანტურაში ჩარიცხვის წესი

21.1 დოქტორანტურაში საბუთების მიღება ცხადდება რექტორის ინდივიდუალური ადმინისტრაციულ-სამართლებრივი აქტით.

21.2. დოქტორანტურაში პირი ჩაირიცხება სადოქტორო პროგრამების ფარგლებში წინასწარ არჩეული სადისერტაციო თემით ან საკვლევი სადოქტორო თემების მიხედვით ჩატარებული საკონკურსო შერჩევის საფუძველზე.

21.3. სადოქტორო პროგრამები და საკვლევი თემები განთავსდება სდასუ-ს ვებ-გვერდზე არანაკლებ ერთი თვით ადრე კონკურსის ჩატარებამდე.

21.4. დოქტორანტობის კანდიდატმა სდასუ-ს რექტორის სახელზე უნდა წარადგინოს განცხადება (დანართი 1). განცხადებას თან ერთვის:

- ა) მონაცემები განათლებისა და შრომითი საქმიანობის შესახებ („CV“);
 - ბ) სათანადო აკადემიური ხარისხის დამადასტურებელი დიპლომის საწარმოო წესით დამოწმებული ასლი;
 - გ) პირადობის მოწმობის (პასპორტის) ასლი.
 - დ) სადოქტორო პროგრამის ხელმძღვანელის (სადოქტორო საკვლევი თემების კონკურსში მონაწილისათვის) ან სადისერტაციო თემის სავარაუდო ხელმძღვანელის შუამდგომლობა სათანადო დასაბუთებით;
 - ე) განმცხადებლის წერილობითი დასტური იმისა, რომ არ ირიცხება სხვა უმაღლესი საგანმანათლებლო დაწესებულების დოქტორანტურაში (დანართი 2).
- 21.5. სადისერტაციო თემის სავარაუდო ხელმძღვანელის შუამდგომლობაში დასაბუთებული უნდა იყოს შერჩეული თემის აქტუალურობა, სიახლე და მნიშვნელობა.
- 21.6. დოქტორანტურაში ჩარიცხვის წინაპირობაა დოქტორანტობის კანდიდატთა შესარჩევ კონკურსში გამარჯვება, რომელიც ორი ეტაპისგან შედგება: პირველ ეტაპზე დოქტორანტობის კანდიდატი გამოცდას ჩააბარებს უცხოურ ენაში (ინგლისურ ენაში) B2 დონეზე (საჭიროების შემთხვევაში – ქართულ ენაშიც) სდასუ-ს რექტორის ბრძანებით შექმნილ კომისიასთან (შესაბამისი სერტიფიკატის არარსებობის შემთხვევაში); მეორე ეტაპზე დოქტორანტურაში ჩარიცხვის კანდიდატი გასაუბრებას გაივლის/გამოცდას ჩააბარებს სადისერტაციო საბჭოს წევრებისგან ბიზნესისა და სოციალურ მეცნიერებათა სკოლის დეკანის წარდგინების საფუძველზე სდასუ-ს რექტორის ბრძანებით შექმნილ დარგობრივ კომისიასთან;
- 21.7. დოქტორანტობის კანდიდატი წერილობითი სახით წარმოადგენს საკუთარ ხედვას (კონცეფციას) საკვლევი თემაში/წინასწარ შერჩეულ სადისერტაციო თემაში დანახული პრობლემების გადაჭრის გზების, კვლევის პროცესში გამოსაყენებელი მეთოდების და სავარაუდო შედეგების შესახებ.
- 21.8. პირი დოქტორანტურაში ჩარიცხება და სამეცნიერო ხელმძღვანელი ან ხელმძღვანელი და თანახელმძღვანელი დაენიშნება, თუ ღია კენჭისყრისას მხარს დაუჭერს კომისიის სხდომაზე დამსწრე წევრთა უმრავლესობა და გამოცდაში (გამოცდებში) მიიღებს დადებით შეფასებას.
- 21.9. გასაუბრების წარმატებით გავლის/გამოცდის (გამოცდების) ჩაბარების შემთხვევაში, სადისერტაციო საბჭოს წარდგინებით, პირი დოქტორანტურაში ჩარიცხება სდასუ-ს რექტორის ბრძანებით.
- 21.10. ჩარიცხვიდან ერთი თვის ვადაში უნივერსიტეტსა და დოქტორანტს შორის იდება ხელშეკრულება, რომელშიც განისაზღვრება მხარეთა უფლებები და მოვალეობები.

მუხლი 22. დოქტორანტი

- 22.1. წინამდებარე დებულებით განსაზღვრული წესით დოქტორანტურაში ჩარიცხული პირი იძენს სდასუ-ს დოქტორანტის სტატუსს.
- 22.2. დოქტორანტს უფლება აქვს;
- ა) აირჩიოს სადისერტაციო თემა;
 - ბ) აირჩიოს სამეცნიერო ხელმძღვანელი ან ხელმძღვანელი და თანახელმძღვანელი;
 - გ) ისარგებლოს სდასუ-ს ბიბლიოთეკით, საინფორმაციო და ტექნიკური ბაზით.
- 22.3. დოქტორანტი ვალდებულია:
- ა) დაიცვას სდასუ-ს დებულება, შინაგანაწესი, ეთიკის კოდექსი, სასწავლო პროცესის რეგულირების წესი, მოცემული დებულება და ხელშეკრულებით ნაკისრი ვალდებულებები;
 - ბ) შეასრულოს ინდივიდუალური (სასწავლო და კვლევითი) გეგმა;
 - გ) დარგობრივი კომისიის სხდომაზე წარადგინოს სამეცნიერო ხელმძღვანელისა ან სამეცნიერო ხელმძღვანელისა და თანახელმძღვანელის ხელმოწერით დადასტურებული ანგარიში ინდივიდუალური (სასწავლო და კვლევითი) გეგმის კვლევითი კომპონენტის შესრულების მიმდინარეობის შესახებ.
 - დ) გადაიხადოს სწავლის საფასური ხელშეკრულებით დადგენილ ვადაში.
- 22.4. ამ დებულების 22.3 „გ“ ქვეპუნქტის შეუსრულებლობის შემთხვევაში საკითხს განიხილავს სადისერტაციო საბჭო.

მუხლი 23. დოქტორანტის სამეცნიერო ხელმძღვანელი ან სამეცნიერო ხელმძღვანელი და თანახელმძღვანელი

- 23.1. სადისერტაციო საბჭო უზრუნველყოფს დოქტორანტს სამეცნიერო ხელმძღვანელით ან სამეცნიერო ხელმძღვანელით და თანახელმძღვანელით. ამასთან, დოქტორანტს ეძლევა შესაძლებლობა თვითონ აირჩიოს სამეცნიერო ხელმძღვანელი ან სამეცნიერო ხელმძღვანელი და თანახელმძღვანელი.

- 23.2 დოქტორანტის სამეცნიერო ხელმძღვანელი შეიძლება იყოს მხოლოდ სდასუ-ს ბიზნესისა და სოციალურ მეცნიერებათა სკოლის სადისერტაციო საბჭოს წევრი. თანახელმძღვანელი შეიძლება იყოს დოქტორის ან მასთან გათანაბრებული სამეცნიერო ხარისხის მქონე პირი, რომელიც არ არის სადისერტაციო საბჭოს წევრი. სამეცნიერო ხელმძღვანელს ან სამეცნიერო ხელმძღვანელს და თანახელმძღვანელს დოქტორანტის სადისერტაციო თემასთან დაკავშირებული სპეციალობით უნდა ჰქონდეს კვლევის გამოცდილება (გამოქვეყნებული მინიმუმ ერთი ნაშრომი).
- 23.3 სამეცნიერო ხელმძღვანელი ან სამეცნიერო ხელმძღვანელი და თანახელმძღვანელი ზედამხედველობას და კონტროლს უწევს დოქტორანტის მიერ ინდივიდუალური გეგმის შესრულებას, ხელს უწყობს/უწყობენ დოქტორანტს სადისერტაციო საკვლევი თემის დამოუკიდებლად დამუშავებაში.
- 23.4 დოქტორანტის დასაბუთებული განცხადების საფუძველზე დასაშვებია დისერტაციის თემისა და/ან სამეცნიერო ხელმძღვანელის ან თანახელმძღვანელის შეცვლა. დისერტაციის თემის შეცვლის ან სათაურის დაზუსტებისთვის დამატებით აუცილებელია დოქტორანტის სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის დასაბუთებული შუამდგომლობა.
- 23.5 სამეცნიერო ხელმძღვანელს ან სამეცნიერო ხელმძღვანელის და თანახელმძღვანელის დასაბუთებული მიზეზის არსებობის შემთხვევაში უფლება აქვს უარი თქვას ხელმძღვანელობაზე ან თანახელმძღვანელობაზე, რის თაობაზეც სადისერტაციო საბჭოს თავმჯდომარეს წარუდგენს დასაბუთებულ ახსნა-განმარტებას.
- 23.6 დოქტორანტისთვის სამეცნიერო თემის და/ან სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის შეცვლის საკითხს წყვეტს სადისერტაციო საბჭო.
- 23.7 გადაწყვეტილებას იმის თაობაზე, თუ რამდენ დოქტორანტს შეუძლია უხელმძღვანელოს პროფესორმა, იღებს სადისერტაციო საბჭო, პროფესორის აზრის გათვალისწინებით და მისი დატვირთვიდან გამომდინარე.

მუხლი 24. დოქტორანტურაში სწავლის ხანგრძლივობა

- 24.1 დოქტორანტურაში მიღება ცხადდება შემოდგომის და/ან გაზაფხულის სემესტრებისთვის.
- 24.2 სადოქტორო პროგრამა შედგენილია 6 სემესტრიანი პერიოდისთვის.
- 24.3 დოქტორანტურაში სწავლის პერიოდში სადისერტაციო თემის შეცვლის შემთხვევაში ინდივიდუალური გეგმის საკითხსა და დოქტორანტურაში სწავლების ვადებს განსაზღვრავს სადისერტაციო საბჭო.
- 24.4 დოქტორანტურაში სწავლის ხანგრძლივობა არ უნდა აღემატებოდეს 5 წელს.

მუხლი 25. დოქტორანტის სტატუსის შეჩერება

- 25.1 დოქტორანტის სტატუსის შეჩერების საკითხი განიხილება სდასუ-ს სასწავლო პროცესის რეგულირების წესის შესაბამისად.

მუხლი 26. დოქტორანტის სტატუსის შეწყვეტა

- 26.1 სადისერტაციო საბჭოს გადაწყვეტილებით, დოქტორანტს შეიძლება დოქტორანტის სტატუსი შეუწყდეს:
- ა) პლაგიატის ან მონაცემების გაყალბების დადასტურების შემთხვევაში;
 - ბ) უნივერსიტეტსა და დოქტორანტს შორის დადებული ხელშეკრულებით გათვალისწინებული ვალდებულებების შეუსრულებლობისას;
 - გ) სამეცნიერო ხელმძღვანელის ან სამეცნიერო ხელმძღვანელისა და თანახელმძღვანელის შუამდგომლობით, თუ მას მიაჩნია, რომ დოქტორანტი სწავლის დარჩენილ პერიოდში ვერ შეასრულებს ინდივიდუალური გეგმით გათვალისწინებულ ელემენტებს; სამეცნიერო ხელმძღვანელსა და თანახელმძღვანელს შორის განსხვავებული პოზიციის არსებობის შემთხვევაში, საკითხს განიხილავს და სადისერტაციო საბჭოს შესაბამისი შუამდგომლობით მიმართავს სადოქტორო პროგრამის ხელმძღვანელი.
 - დ) პირადი განცხადების საფუძველზე;
 - ე) სასწავლო პროცესის რეგულირების წესით გათვალისწინებულ სხვა შემთხვევებში.
- 26.2 ამ მუხლის პირველი პუნქტის „გ“ ქვეპუნქტით გათვალისწინებულ შემთხვევაში, დოქტორანტს სტატუსი შეუწყდება, თუ შუამდგომლობას მხარს დაუჭერს სადისერტაციო საბჭოს სხდომაზე დამსწრეთა

არანაკლებ 2/3. დოქტორანტიისთვის სტატუსის შეწყვეტა მოხდება სდასუს რექტორის ბრძანების საფუძველზე.

26.3 დოქტორანტიისთვის სტატუსის შეწყვეტის შესახებ შუამდგომლობის დაკმაყოფილებაზე უარის თქმის შემთხვევაში, სადისერტაციო საბჭოს გადაწყვეტილებით, დოქტორანტს შეიძლება შეეცვალოს სადისერტაციო თემა და/ან სამეცნიერო ხელმძღვანელი/თანახელმძღვანელი.

მუხლი 27. დოქტორანტურის საფასური და დაფინანსება

27.1 დოქტორანტურაში სწავლის საფასური განისაზღვრება რექტორის ინდივიდუალურ-სამართლებრივი აქტით.

27.2 სადოქტორო პროგრამის დაფინანსება ხორციელდება:

ა) დოქტორანტის ან სდასუს-ს მიერ მოპოვებული გრანტებით;

ბ) მიზნობრივი დაფინანსებით—იურიდიული და ფიზიკური პირების მიერ, სადოქტორო პროგრამებიდან ან საკვლევი თემებიდან ერთი ან რამდენიმეს განსახორციელებლად, გამოყოფილი სახსრებით;

გ) თვითდაფინანსებით—დოქტორანტის მიერ დოქტორანტურაში სწავლის საფასურის დამოუკიდებლად დაფარვით.

27.3 სადოქტორო პროგრამები შესაძლებელია დაფინანსდეს სხვა ისეთი, მათ შორის ეკონომიკური საქმიანობით მიღებული წყაროებიდანაც, რომლებიც არ ეწინააღმდეგებიან საქართველოს კანონმდებლობას.

თავი III. ეკონომიკის დოქტორის აკადემიური ხარისხის მინიჭების წესი

მუხლი 28. სადისერტაციო საქმისწარმოების დაწყება

28.1 დისერტაცია არის დოქტორანტის მიერ დოქტორანტურაში სწავლის პერიოდში შესრულებული სამეცნიერო ნაშრომი, რომელსაც დოქტორანტი იცავს ეკონომიკის დოქტორის აკადემიური ხარისხის მოსაპოვებლად.

28.2 დოქტორანტს ეკონომიკის დოქტორის აკადემიური ხარისხი მიენიჭება დოქტორანტურის დასრულებისა და დისერტაციის წარმატებით დაცვის შემთხვევაში.

28.3 სადისერტაციო საქმისწარმოება იწყება სადისერტაციო საბჭოს მიერ სადისერტაციო თემის დამტკიცებით.

მუხლი 29. დისერტაციის წარდგენის წინაპირობა

29.1 დასრულებული სახით დისერტაცია წარედგინება სადისერტაციო საბჭოს.

29.2 დისერტაციის წარდგენამდე დოქტორანტი ვალდებულია შეასრულოს სადოქტორო პროგრამით გათვალისწინებული მოთხოვნები.

29.3 დისერტაციის წარდგენისას დოქტორანტმა უნდა წარმოადგინოს სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის წერილობითი დადებითი დასკვნა/დასკვნები იმის თაობაზე, რომ გაეცნო დისერტაციას, დოქტორანტმა შეასრულა ინდივიდუალური გეგმით გათვალისწინებული სამუშაო და სადისერტაციო ნაშრომი მზად არის დასაცავად. დასკვნაში ყურადღება უნდა გამახვილდეს ნაშრომის აქტუალობაზე, სტრუქტურაზე, შინაარსზე, ანალიზის სიღრმესა და კვლევის ხარისხზე, სიახლეზე, მონაცემთა სარწმუნოობაზე, გამოყენებულ უახლეს ლიტერატურაზე, ციტირებებზე, აკადემიურ სტილზე და დისერტაციისადმი წაყენებულ სხვა მოთხოვნებზე.

29.4 დისერტაციის წარდგენის წინაპირობაა დოქტორანტის მიერ რეცენზირებად სამეცნიერო პერიოდიკაში (მათ შორის ერთი სამეცნიერო ნაშრომის (სტატიის) გამოქვეყნება საზღვარგარეთ გამოცემულ და შესაბამის საერთაშორისო კლასიფიკატორში დაფიქსირებულ რეფერირებად/რეცენზირებად ან იმპაქტ-ფაქტორის მქონე peer-reviewed ჟურნალში ან შესაბამის დარგობრივ საერთაშორისო სამეცნიერო ჟურნალში ან საერთაშორისო სამეცნიერო კონფერენციის მასალებში (ე.წ. Proceedings) დისერტაციის შემადგენელი სამი სამეცნიერო სტატიის გამოქვეყნება. საქართველოში გამოცემულ და შესაბამის საერთაშორისო კლასიფიკატორში დაფიქსირებულ რეფერირებად/რეცენზირებად ელექტრონულ და/ან ბეჭდურ ჟურნალში გამოქვეყნებული ნაშრომი უტოლდება უცხოურ რეფერირებად/რეცენზირებად ჟურნალში გამოქვეყნებულს.

მუხლი 30. დისერტაციისთვის წაყენებული მოთხოვნები

30.1 დისერტაცია უნდა წარმოადგენდეს დოქტორანტი დამოუკიდებელი სამეცნიერო კვლევის დასაბუთებულ შედეგს, უნდა იყოს აქტუალური, ახასიათებდეს მეცნიერული სიახლე, მასში გადაწყვეტილი უნდა იყოს ეკონომიკური მეცნიერებისთვის პრობლემატურად მიჩნეული ერთი საკითხი მაინც, რითაც დოქტორანტს უნდა შეჰქონდეს საკუთარი წვლილი ეკონომიკის შესაბამისი დარგის განვითარებაში.

30.2 დისერტაცია შესრულებული უნდა იყოს ქართულ ენაზე.

30.3 სადისერტაციო საბჭოს ნებართვით, გამოჩაკლის შემთხვევებში, დასაშვებია დისერტაციის სხვა ენაზე შესრულება. ასეთ შემთხვევაში დოქტორანტი ვალდებულია სადისერტაციო საბჭოს ქართულ ენაზე წარუდგინოს სადისერტაციო კვლევის ძირითადი შედეგები.

30.4 სადისერტაციო ნაშრომის სტრუქტურა პირობითად სამი ნაწილითაა წარმოდგენილი: ფორმალური ნაწილი; არსებითი ნაწილი; დამატებითი ნაწილი.

30.4.1 ფორმალური ნაწილის კომპონენტებია:

თავფურცელი - სადისერტაციო ნაშრომის 1-ლი გვერდი, რომელზედაც განთავსებულია თემის სათაური, ავტორისა და სამეცნიერო ხელმძღვანელის ან სამეცნიერო ხელმძღვანელისა და თანახელმძღვანელის სახელი და გვარი, უნივერსიტეტი, რომელშიც დისერტაციის დაცვა შედგება, უნივერსიტეტის ადგილმდებარეობა (ქალაქის დასახელება) და დაცვის წელი.

განაცხადი ეთიკის თაობაზე - სადისერტაციო ნაშრომის ავტორის განაცხადი იმის შესახებ, რომ ნაშრომი არ არის პლაგიატი, ორიგინალურია, სხვა ავტორთა მოსაზრებები, დებულებები მითითებულია დადგენილი წესით, კვლევის მეთოდების გამოყენებისას დაცულია ეთიკის ნორმები. ტექსტის ქვემოთ კეთდება ავტორის პირადი ხელმოწერა. განაცხადისთვის გამოიყოფა ცალკე ფურცელი.

სარჩევი - მიეთითება შესავალი, ყველა თავი, ქვეთავი, დასკვნა, დანართი, ბიბლიოგრაფია.

30.4.2 არსებითი ნაწილი შედგება შესავლის, ძირითადი ტექსტისა და დასკვნისაგან.

შესავალი - სადისერტაციო ნაშრომის ზოგადი ნაწილია, რომელშიც უნდა გამოიკვეთოს საკვლევი პრობლემატიკა, განისაზღვროს კვლევის აქტუალურობა, დასაბუთდეს მისი მნიშვნელობა და აუცილებლობა, წარმოჩნდეს კვლევის მიზნები და ამოცანები, პრობლემის დამუშავების ხარისხი, კვლევის მეთოდოლოგია გამოყენებული მეთოდების რელევანტურობის ჩვენებით, აღიწეროს კვლევის შედეგები, გამოიკვეთოს ძირითადი დებულებები, სიახლე, წარმოჩნდეს დისერტაციის თეორიული და პრაქტიკული მნიშვნელობა.

ძირითადი ტექსტი - შედგება თავებისა და ქვეთავებისგან. მათში ხდება გამოყენებული წყაროების პრობლემატიკასთან დაკავშირებული ნაშრომების, ჩატარებული კვლევის დაწვრილებით აღწერა გამოყენებული მეთოდების მითითებით, კვლევის შედეგების, საკუთარი მიგნებების, სიახლის (ახალი მიდგომების, წარმოდგენების, პრობლემის გადაწყვეტის ორიგინალური მოდელის, მოვლენის განვითარების კანონზომიერების, არსებული ტერმინების ახლებური განმარტების, ახალი მეცნიერული/დარგობრივი მიმართულების ჩამოყალიბების და ა.შ.) გამოკვეთა. საილუსტრაციო მასალებიდან ძირითად ტექსტში შეიძლება განთავსდეს კვლევის შედეგად დისერტაციის ავტორის მიერ შემუშავებული ცხრილები და გრაფიკები, ავტორის მიერვე შემუშავებული დოკუმენტები პროექტების, მოდელების, ნიმუშების და სხვათა სახით.

დასკვნა - სადისერტაციო ნაშრომის ლოგიკური დასრულებაა, რომელშიც კომპაქტურად ჯამდება კვლევის შედეგები, არსებითად წარმოჩნდება სიახლე და მისი მნიშვნელობა, განისაზღვრება რეკომენდაციები.

ნაშრომს თან ერთვის **გამოყენებული ლიტერატურა** (ბიბლიოგრაფია) და სხვა წყაროების (ინტერნეტ-მასალები და ა.შ.) ჩამონათვალი ანბანური თანმიმდევრობით - ჯერ ქართულენოვანი გამოცემები, შემდეგ უცხოური.

30.4.3 დამატებითი ნაწილი

საჭიროების შემთხვევაში, დასაშვებია გამოყენებული ნორმატიული აქტებისა და დოკუმენტების, გამოკითხვების, სტატისტიკური კვლევების მასალების, სქემების, დიაგრამების, აგრეთვე სხვა სახის დანართების არსებობა (რომელიც არ შედის ძირითად ტექსტში).

30.5 სადისერტაციო ნაშრომის ძირითადი ტექსტი არ უნდა იყოს 120 გვერდზე ნაკლები და 180 გვერდზე მეტი. დასახელებული რაოდენობა არ მოიცავს გვერდებს, რომლებზეც განთავსდება დამატებითი მასალები, დისერტაციის ფორმალური ნაწილის კომპონენტები და ბიბლიოგრაფია.

30.6 სადისერტაციო ნაშრომის ტექნიკური მოწყობები: ფურცლის ზომა A4, ორიენტაცია – ვერტიკალური. ბეჭდვა უნდა წარმოებდეს მხოლოდ ერთ გვერდზე. შრიფტი „სილფაენი“, ტექსტის შრიფტის ზომა 12, თავის სათაურის შრიფტის ზომა 14 Bold, ქვეთავის სათაურისა - 12 Bold, სქოლიოსი -10, ტექსტის სტრიქონებს შორის მანძილი 1,5, ქვეთავის სათაური თავის სათაურისა და ტექსტისგან გამოიყოფა 2-2 ინტერვალის გამოტოვებით.

- ყოველი თავი იწყება ახალი გვერდიდან; მცირე ზომის სექციებისთვის (სარჩევი/შინაარსი, ცხრილების ნუსხა, სქოლიო, შენიშვნა და სხვ.) აიღება ინტერვალი 1. გვერდის ველები: მარცხენა კიდიდან 3 სმ., მარჯვენა კიდიდან 1,5 სმ., ზედა და ქვედა კიდიდან 2 სმ., აბზაცი - ყველა სტრიქონი, თანაბრად უნდა იყოს დაშორებული შესაბამისი მინდვრიდან. სატიტულოს გარდა, ყველა გვერდი ინომრება არაბული ციფრებით (1; 2; 3...). ნომერი განთავსდება ქვემოთ.
- 30.7 გამოყენებული ლიტერატურა (ბიბლიოგრაფია) განთავსდება ნაშრომის ბოლოს ანბანური თანმიმდევრობით ქართულ, შემდეგ კი - უცხოურ ენებზე. წყაროების ჩამოთვლისას დაცულ უნდა იქნას შემდეგი რიგითობა: წიგნები და მონოგრაფიები, სამეცნიერო სტატიები პერიოდულ გამოცემებში, დისერტაციები, ინტერნეტწყაროები.
- 30.8 გამოყენებული წყაროების ნუსხაში უნდა მიეთითოს:
- 30.8.1 წიგნის ან მონოგრაფიის გამოყენების შემთხვევაში:
ავტორის/ავტორების გვარი და ინიციალი/ინიციალები, სახელწოდება, გამოცემის ადგილი, გამომცემლობის დასახელება, გამოცემის წელი.
- 30.8.2 პერიოდული გამოცემის გამოყენების შემთხვევაში:
ავტორის/ავტორების გვარი და ინიციალი/ინიციალები, სტატიის სათაური, ჟურნალის სახელწოდება, ტომის ნომერი, გამოცემის ნომერი, გამოცემის წელი.
- 30.8.3 ინტერნეტის გამოყენების შემთხვევაში:
მასალის ავტორი, მასალის დასახელება, ბმულის მინიშნება, მასალის მოძიების თარიღი
- 30.9 სადისერტაციო ნაშრომს თან უნდა ახლდეს ავტორეფერატი - დისერტაციის შემოკლებული ვერსია ქართულ ენაზე და, შესაბამისი თარგმანით ინგლისური ენაზე. ქართული და უცხოენოვანი ვერსიები იკინდება ერთად სტანდარტული A5 ზომის 30-დან 45 გვერდამდე მოცულობით. ავტორეფერატის სტრუქტურა სავალდებულო წესით უნდა მოიცავდეს სადისერტაციო ნაშრომის შესავალს უცვლელად, დისერტაციის თითოეული თავის მოკლე მიმოხილვას, სადისერტაციო ნაშრომის დასკვნას სრულად და გამოქვეყნებული ნაშრომების სიას.
- 30.10 ავტორეფერატის ტექნიკური მონაცემები:
ფურცლის ზომა A5, ბეჭდვა უნდა წარმოებდეს ორივე გვერდზე. შრიფტი „Sylfaen“, ტექსტის შრიფტის ზომა 10, სათაურის შრიფტის ზომა 11 Bold, ტექსტის სტრიქონებს შორის მანძილი 1, აბზაცები ერთმანეთისგან და სათაურისგან გამოიყოფა თითო ინტერვალის გამოტოვებით; გვერდის ველები: თითოეული კიდიდან 1,5 სმ., აბზაცი - ყველა სტრიქონი, თანაბრად უნდა იყოს დაშორებული შესაბამისი მინდვრიდან. სატიტულოს (ყდის) გარდა, ყველა გვერდი ინომრება არაბული ციფრებით (1; 2; 3...). ნომერი განთავსდება გვერდის ქვემოთ. სატიტულო გვერდისადმი მოთხოვნები ისეთივეა, როგორც დისერტაციის შემთხვევაში.

მუხლი 31. დისერტაციის წარდგენა

- 31.1 დოქტორანტი კანცელარიას აბარებს დისერტაციის 2 და ავტორეფერატის 5 აკინძულ ბეჭდურ და თითოეულის ელექტრონულ (PDF) ვერსიას; სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის წერილობით დასკვნ(ებ)ას; ახსნა-განმარტებას იმის თაობაზე, რომ თემა მის მიერაა შესრულებული და ნაშრომში გამოყენებული ყველა წყარო სათანადოდაა მითითებული.
- 31.2 დისერტაცია და წარმოდგენილი მასალები შემოწმების მიზნით განსახილველად წარედგინება სწავლულ მდივანს.
- 31.3 სწავლული მდივანი დისერტაციის ჩაბარებიდან ორ კვირის ვადაში ამზადებს შესაბამის დასკვნას სადისერტაციო საბჭოს თავმჯდომარის სახელზე.
- 31.4 სწავლული მდივანის დადებითი დასკვნის შემთხვევაში საკითხს განიხილავს სადისერტაციო საბჭო.
- 31.5 სწავლული მდივანი სადისერტაციო საბჭოს წარუდგენს სადისერტაციო ნაშრომს, დასკვნას დოქტორანტის ინდივიდუალური გეგმით გათვალისწინებული კომპონენტების - დისერტაციისა და ავტორეფერატის სტანდარტების დაცვით შესრულების თაობაზე, თანმდევი დოკუმენტაციის შეფასების თაობაზე და მიმართავს შუამდგომლობით ოპონენტების დანიშვნის შესახებ.
- 31.6 დისერტაცია წარდგენისთანავე გადაეცემა სდასუ-ს ბიბლიოთეკას, ხოლო მისი ავტორეფერატი განთავსდება უნივერსიტეტის ვებ-გვერდზე ინფორმაციის თანხლებით იმის შესახებ, რომ სადისერტაციო ნაშრომის სრული ვერსიის ნახვა შესაძლებელია უნივერსიტეტის ბიბლიოთეკაში.
- 31.7 დისერტაციასა და წარმოდგენილ აუცილებელ დოკუმენტაციაში საბჭოს თავმჯდომარის ან სწავლული მდივანის მიერ ხარვეზის/ხარვეზების დადგენის შემთხვევაში მასალები გამოსწორების მიზნით უბრუნდება დოქტორანტს.

- 31.8 დისერტაცია წარდგენილად ითვლება სადისერტაციო საბჭოს სხდომაზე საკითხის განხილვისა და ოპონენტების დანიშვნის შემთხვევაში.
- 31.9 დოქტორანტი თავისუფლდება სემესტრული რეგისტრაციისა და სწავლის საფასურის გადახდისგან სადისერტაციო საბჭოში დისერტაციის წარდგენის მომდევნო სემესტრიდან.

მუხლი 32. ოპონენტების დასკვნები დისერტაციის შესახებ

- 32.1 დისერტაციის წარდგენისას სადისერტაციო საბჭო ნიშნავს არანაკლებ ორ ოპონენტს.
- 32.2 დისერტაციის ოპონენტად შეიძლება დაინიშნოს სადისერტაციო საბჭოს წევრი ან დოქტორის აკადემიური ხარისხის მქონე პირები, რომლებიც არ არიან სადისერტაციო საბჭოს წევრები და რომელთაც აქვთ კვლევის გამოცდილება დოქტორანტის სადისერტაციო თემასთან დაკავშირებული მიმართულებით.
- 32.3 ოპონენტი დასკვნას სადისერტაციო საბჭოს სწავლულ მდივანს წარუდგენს მისთვის დისერტაციის გადაცემიდან 2 თვის განმავლობაში.
- 32.4 შესაბამისი დასაბუთების საფუძველზე ოპონენტი იღებს შემდეგ გადაწყვეტილებას: ა) დისერტაციის დაცვაზე დაშვების შესახებ; ბ) დისერტაციის დაცვაზე უარის თქმის შესახებ.
- 32.5 თუ ორიდან ერთი ოპონენტი უარყოფით დასკვნას დაწერს, დამატებით დაინიშნება ოპონენტი, რომელსაც დასკვნის წარმოსადგენად ეძლევა 1 თვე.
- 32.6 თუ ოპონენტთა უმრავლესობა უარყოფით დასკვნას დაწერს, დისერტაცია დაცვაზე დაშვებული არ იქნება და დოქტორანტი კარგავს იგივე სადისერტაციო ნაშრომის წარდგენის უფლებას.
- 32.7 სადისერტაციო საბჭოს თავმჯდომარემ დოქტორანტს წერილობით უნდა აცნობოს ოპონენტთა მიერ მიღებული გადაწყვეტილებების შესახებ. დაცვაზე დაშვების შემთხვევაში, შეტყობინებაში მითითებული უნდა იყოს დაცვის თარიღი, დრო და ადგილი. შეტყობინებიდან დაცვის თარიღამდე უნდა გავიდეს 1 თვე მაინც.
- 32.8 დოქტორანტს ეძლევა უფლება გაეცნოს ოპონენტთა დასკვნებს.

მუხლი 33. დისერტაციის დაცვაზე დაშვების წინაპირობა

- 33.1 დისერტაციის დაცვაზე დაშვების წინაპირობაა ორი ოპონენტის დადებითი დასკვნა.

მუხლი 34. დისერტაციის დაცვის დანიშვნა

- 34.1 დისერტაციის დაცვაზე დაშვების შემთხვევაში, სადისერტაციო საბჭოს თავმჯდომარე, დოქტორანტის სამეცნიერო ხელმძღვანელთან ან სამეცნიერო ხელმძღვანელთან და თანახელმძღვანელთან შეთანხმებით, ნიშნავს დისერტაციის დაცვის დღეს.
- 34.2 დისერტაციის დაცვის ორგანიზაციულ და მატერიალურ-ტექნიკურ უზრუნველყოფას ახორციელებს ბიზნესისა და სოციალურ მეცნიერებათა სკოლა.

მუხლი 35. დისერტაციის დაცვა

- 35.1 სადისერტაციო (დარგობრივი) კომისია აირჩევა სადისერტაციო საბჭოს მიერ სადისერტაციო თემის შესაბამისი დარგის სპეციალისტებისაგან ღია კენჭისყრით, სხდომაზე დამსწრეთა უმრავლესობით დისერტაციის დაცვამდე არანაკლებ 1 თვით ადრე.
- 35.2 სადისერტაციო (დარგობრივი) კომისია შედგება კომისიის თავმჯდომარის, მდივნისა და წევრებისაგან. სადისერტაციო კომისია უნდა შედგებოდეს მინიმუმ 5 წევრისგან მაინც. სადისერტაციო კომისიაში გადამწყვეტი ხმის უფლებით მონაწილეობენ ოპონენტები.
- 35.3 სწავლული მდივანი ვალდებულია დისერტაციის დაცვამდე ერთი თვით ადრე სადისერტაციო კომისიის წევრებს ელექტრონულად გადაუგზავნოს: ა. დისერტაციის საბოლოო ვარიანტი; ბ. დისერტაციის შეფასების კრიტერიუმები; გ. ოპონენტების დასკვნები დისერტაციაზე.
- 35.4 სადისერტაციო კომისიის წევრი ვალდებულია გაეცნოს დისერტაციას, ოპონენტების წერილობით დასკვნებს და შეფასების არსებულ კრიტერიუმებს.

35.5 სადისერტაციო კომისიის სხდომა გადაწყვეტილებაუნარიანია, თუ მას ესწრება სადისერტაციო (დარგობრივი) კომისიის სრული შემადგენლობის არანაკლებ 2/3.

35.6 გარდა სადისერტაციო (დარგობრივი) კომისიის წევრებისა, სხდომაში სათათბირო ხმის უფლებით მონაწილეობენ დოქტორანტის სამეცნიერო ხელმძღვანელი ან სამეცნიერო ხელმძღვანელი და თანახელმძღვანელი.

35.7 დაცვის პროცესი მოიცავს:

- ა) სადისერტაციო კომისიის თავმჯდომარის მიერ დღის წესრიგის პროექტის გაცნობას და დამტკიცებას;
- ბ) დისერტანტის სამეცნიერო ხელმძღვანელის ან სამეცნიერო ხელმძღვანელისა და თანახელმძღვანელის, სადისერტაციო (დარგობრივი) კომისიის წევრების, ოფიციალური ოპონენტების წარდგენას სადისერტაციო კომისიის თავმჯდომარის მიერ;
- გ) დოქტორანტის პერსონალური მონაცემებისა და სასწავლო-სამეცნიერო აქტივობის შესახებ ინფორმაციის გაცნობას სადისერტაციო (დარგობრივი) კომისიის მდივნის მიერ;
- დ) დოქტორანტის მიერ თემის წარდგენა-პრეზენტაციას, რომლის ხანგრძლივობა, არ უნდა აღემატებოდეს 40 წუთს;
- ე) დისერტანტის პასუხს სადისერტაციო კომისიის თავმჯდომარისა და წევრების, ასევე დამსწრე საზოგადოების შეკითხვებზე, რაც დროში რეგლამენტირებული არ არის;
- ვ) ოფიციალური ოპონენტების მიერ დასკვნის წარდგენას, რომლის ხანგრძლივობა არ უნდა აღემატებოდეს 15-15 წუთს და დისერტანტის პასუხს შენიშვნებზე;
- ზ) სამეცნიერო ხელმძღვანელის ან სამეცნიერო ხელმძღვანელის და თანახელმძღვანელის მიერ დოქტორანტისა და მისი სამეცნიერო-კვლევითი აქტივობის წარდგენა-დახასიათება (არაუმეტეს 10 წუთი);
- თ) აზრის გამოთქმას სადისერტაციო კომისიის წევრებისა და დამსწრე საზოგადოების მიერ (არაუმეტეს 3-3 წთ);
- ი) დისერტაციის დაცვის შეფასებას დახურულ სხდომაზე ფარული წესით;
- კ) დისერტაციის დაცვის შეფასების შედეგების გაცნობას;
- ლ) დოქტორანტის 5-წუთიან დასკვნით სიტყვას.

35.8 ერთ დღეს ერთი სადისერტაციო კომისიის წინაშე შეიძლება დაინიშნოს მხოლოდ ერთი დისერტაციის დაცვა.

35.9 დისერტაციის დაცვა შედგება საქართველოს სახელმწიფო ენაზე. იმ შემთხვევაში, თუ სადისერტაციო საბჭოს გადაწყვეტილებით დასაშვებად იქნება მიჩნეული დისერტაციის დაცვა სხვა ენაზე, დისერტანტი ვალდებულია უზრუნველყოს შესაბამისი კვალიფიკაციის მქონე თარჯიმნის მონაწილეობა დაცვის პროცესში.

35.10 დაცვის პროცესის მსვლელობასა და შედეგზე დგება დისერტაციის დაცვის ოქმი. დისერტაციის დაცვის პროცესის დოკუმენტირება ხდება, ასევე, აუდიო/ვიდეო ჩანაწერით რომელიც წარმოადგენს ოქმის შემადგენელ ნაწილს.

35.11 ოქმის წარმოებას უზრუნველყოფს სადისერტაციო (დარგობრივი) კომისიის მდივანი.

მუხლი 36. დისერტაციის შეფასება

36.1 სადისერტაციო კომისია გადაწყვეტილებას დისერტაციის შეფასების შესახებ იღებს ფარული წესით, უშუალოდ დაცვის შემდეგ დახურულ დასკვნით სხდომაზე.

36.2 სადისერტაციო (დარგობრივი) კომისია დისერტაციის შეფასებას განახორციელებს დანართი #5 შესაბამისად. დისერტაციის შეფასებაში მონაწილეობას არ ეძლეობენ დოქტორანტის სამეცნიერო ხელმძღვანელი ან სამეცნიერო ხელმძღვანელი და თანახელმძღვანელი. დისერტაციის შეფასების საშუალო მაჩვენებელს გამოიყვანს სადისერტაციო (დარგობრივი) კომისიის თავმჯდომარე.

36.3 დისერტაცია დაცულად მიიჩნევა, თუ სადისერტაციო (დარგობრივი) კომისიის წევრთა შეფასებების საშუალო მაჩვენებელი შეადგენს დადგენილი მაქსიმალური შეფასების 51 %-ს და მეტს.

36.4 დისერტაციის შეფასება განხორციელდება შემდეგი სისტემით:

ქულა	შეფასება	
91-100 ქულა	summa cum laude	ფრიადი (შესანიშნავი ნაშრომი)
81-90 ქულა	magna cum laude	მალიან კარგი (შედეგი, რომელიც წაყენებულ მოთხოვნებს ყოველმხრივ

		ადმატება)
71-80 ქულა	cum laude	კარგი (შედეგი, რომელიც წაყენებულ მოთხოვნებს ადმატება)
61-70 ქულა	Bene	საშუალო (შედეგი, რომელიც წაყენებულ ძირითად მოთხოვნებს ყოველმხრივ აკმაყოფილებს)
51-60 ქულა	Rite	დამაკმაყოფილებელი (შედეგი, რომელიც, ხარვეზების მიუხედავად, წაყენებულ მოთხოვნებს მაინც აკმაყოფილებს)
41-50 ქულა	Insufficienter	არადამაკმაყოფილებელი (არადამაკმაყოფილებელი დონის ნაშრომი, რომელიც ვერ აკმაყოფილებს წაყენებულ მოთხოვნებს მასში არსებული მნიშვნელოვანი ხარვეზების გამო)
0-40 ქულა	sub omni canone	სრულიად არადამაკმაყოფილებელი (შედეგი, რომელიც წაყენებულ მოთხოვნებს სრულიად ვერ აკმაყოფილებს)

36.5 სადისერტაციო კომისიის თავმჯდომარე სხდომის დასრულებისთანავე ღიად აცხადებს კომისიის გადაწყვეტილებას, რომელიც აისახება სადისერტაციო კომისიის სხდომის ოქმში.

36.6 თუ დისერტაციამ დაიმსახურა „არადამაკმაყოფილებელი“ (41-50 ქულა) შეფასება დოქტორანტს ეძლევა 1 წლის განმავლობაში გადამუშავებული სადისერტაციო ნაშრომის წარდგენის უფლება. დისერტანტის განცხადება განმეორებითი დაცვის თხოვნით სადისერტაციო საბჭოს თავმჯდომარის სახელზე წარდგენილი უნდა იყოს სადისერტაციო საბჭოს სწავლულ მდივანთან, არაუგვიანეს 3 თვისა დისერტაციის დაცვის შედეგების გამოცხადებიდან.

36.7 არსებითი ხასიათის ხარვეზების გამო დისერტაციის „სრულიად არადამაკმაყოფილებელი“ (41-ზე ნაკლები ქულა) შეფასების შემთხვევაში, დოქტორანტი კარგავს იგივე სადისერტაციო ნაშრომის წარდგენის უფლებას.

36.8 დაცული სადისერტაციო ნაშრომი განთავსდება სდასუ-ს ვებ-გვერდზე.

მუხლი 37. ეკონომიკის დოქტორის აკადემიური ხარისხის მინიჭება

37.1 სადისერტაციო (დარგობრივი) კომისიის მიერ დისერტაციის დაცულად გამოცხადების შესახებ გადაწყვეტილებას განიხილავს და ეკონომიკის დოქტორის აკადემიური ხარისხის - doctoris Economics (შეესატყვისება PhD in Economics) მინიჭების შესახებ შესახებ დადგენილებას იღებს სადისერტაციო საბჭო.

მუხლი 38 ეკონომიკის დოქტორის აკადემიური ხარისხის დამადასტურებელი დიპლომი

38.1 ეკონომიკის დოქტორის აკადემიური ხარისხის მინიჭება დასტურდება ეკონომიკის დოქტორის დიპლომის გაცემით.

38.2 დიპლომის ასლი ინახება უნივერსიტეტის არქივში.

38.3 დიპლომის გაცემამდე შესაბამის პირზე გაიცემა ცნობა ეკონომიკის დოქტორის აკადემიური ხარისხის მინიჭების შესახებ.

მუხლი 39. დისერტაციის გამოქვეყნება

39.1 წარმატებით დაცული სადისერტაციო ნაშრომის ერთი ელექტრონული (PDF) ვერსია გადაეცემა სდასუ-ს ბიბლიოთეკას.

39.2 წარმატებით დაცული სადისერტაციო ნაშრომის ბეჭდური ფორმით გამოქვეყნების შემთხვევაში, დისერტაციის 2 ეგზემპლარი დისერტანტმა უსასყიდლოდ უნდა გადასცეს სდასუ-ს ბიბლიოთეკას და ერთი ეგზემპლარი ჩააბაროს საჯარო ბიბლიოთეკას.

39.3 სადისერტაციო ნაშრომის წარმატებით დაცვის შემდეგ დისერტაციის და ავტორეფერატის თითო ნაბეჭდი და თითოეულის ელექტრონული (PDF) ვერსია ჩაბარდება საქართველოს პარლამენტის ეროვნულ ბიბლიოთეკას.

39.3 საქართველოს და საზღვარგარეთის უმაღლესი საგანმანათლებლო დაწესებულებების, სამეცნიერო-კვლევითი ინსტიტუტების, ბიბლიოთეკებისა და სხვა ორგანიზაცია-დაწესებულებების, აგრეთვე იმ მეცნიერთა ნუსხას, ვისაც უნდა გაეგზავნოს წარმატებით დაცული სადისერტაციო ნაშრომის ელექტრონული ვერსია, განსაზღვრავს და ამტკიცებს სადისერტაციო საბჭო.

თავი V. ეკონომიკის საპატიო დოქტორის წოდების მინიჭება

მუხლი 40. ეკონომიკის საპატიო დოქტორის წოდება

- 40.1 განსაკუთრებული სამეცნიერო დამსახურებისათვის, რეფორმების წარმატებით განხორციელებაში გამორჩეული წვლილისათვის საქართველოს ან უცხო ქვეყნის მოქალაქე მეცნიერს ან საზოგადო მოღვაწეს შეიძლება მიენიჭოს ეკონომიკის საპატიო დოქტორის წოდება – doctor honoris causa.
- 40.2 ეკონომიკის საპატიო დოქტორის წოდების მინიჭების თაობაზე გადაწყვეტილებას სადისერტაციო საბჭოს წარდგინების საფუძველზე იღებს სდასუს აკადემიური საბჭო.

თავი VI. გარდამავალი და დასკვნითი დებულებები

მუხლი 41. გარდამავალი დებულებები

- 41.1 წინამდებარე დებულების ამოქმედებამდე სდასუს ბიზნესისა და სოციალურ მეცნიერებათა სკოლის დოქტორანტურაში ჩარიცხულ პირთა მიერ მოპოვებული კრედიტები და შეფასებული კვლევითი სამუშაოები გადახედვას არ ექვემდებარება.
- 41.2 საქართველოს განათლებისა და მეცნიერების მინისტრის 2016 წლის 29 იანვრის ბრძანების (N07/5) შესაბამისად სტუდენტს, რომელსაც 2016 წლის 1 სექტემბრამდე კვლევით კომპონენტში მიღებული ჰქონდა შუალედური და დასკვნითი შეფასებები და მინიჭებული შესაბამისი კრედიტი, ეს კრედიტი/კრედიტები მას შეუნარჩუნდება. კვლევით კომპონენტში დადგენილ 120 კრედიტის ზღვრულ დონემდე დარჩენილი კრედიტების მოცულობა კი, მიენიჭება ამ სტუდენტის სადისერტაციო ნაშრომის დაცვას.

მუხლი 42. დასკვნითი დებულებები

- 42.1 სადისერტაციო საბჭოს წევრთა და დოქტორანტთა უფლება-მოვალეობის, აგრეთვე დოქტორანტურაში სწავლასთან და დისერტაციის დაცვასთან დაკავშირებული ურთიერთობები, რომლებიც არ არის ასახული წინამდებარე დებულებაში, მოწესრიგდება საქართველოს კანონმდებლობით, დოქტორანტურის სტანდარტით, სდასუს დებულებითა და ბიზნესისა და სოციალურ მეცნიერებათა სკოლის დებულებით.
- 42.2 სადისერტაციო საბჭოს საქმიანობასთან, დოქტორანტურაში სწავლასთან და სწავლებასთან, აგრეთვე დისერტაციის დაცვასთან და სდასუს ეკონომიკის დოქტორის აკადემიური ხარისხის მინიჭებასთან დაკავშირებული სადაო საკითხები გადაწყდება სადისერტაციო საბჭოს მიერ საქართველოს კანონმდებლობის, სდასუს დებულების, ეთიკის კოდექსით, ბიზნესისა და სოციალურ მეცნიერებათა სკოლის დებულებითა და წინამდებარე დებულებაში მოცემული ნორმების საფუძველზე. შეუთანხმებლობის შემთხვევაში, მოდავე მხარეს უფლება აქვს მიმართოს სდასუს აკადემიურ საბჭოს ან სასამართლოს.

მუხლი 43. სადისერტაციო საბჭოს დებულების შემუშავება და ძალაში შესვლა

- 43.1 სადისერტაციო საბჭოს დებულებას შემუშავებს ბიზნესისა და სოციალურ მეცნიერებათა სკოლის საბჭო და ამტკიცებს სდასუს აკადემიური საბჭო.
- 43.2 სადისერტაციო საბჭოს დებულება ძალაში შედის სდასუს აკადემიური საბჭოს მიერ დამტკიცებისთანავე, რაც დადასტურდება რექტორის ხელმოწერით.
- 43.3 სადისერტაციო საბჭოს წინამდებარე დებულების ამოქმედების დღიდან ყოველგვარი ცვლილება-დამატება მასში ძალაში შევა სკოლის საბჭოს მიერ შემუშავებული ცვლილება-დამატებების პროექტის აკადემიური საბჭოს მიერ დამტკიცებისა და რექტორის ხელმოწერისთანავე.
- 43.4 რექტორის ხელმოწერისთანავე წინამდებარე დებულება განთავსდება სდასუს ვებ-გვერდზე.

შპს საქართველოს დავით აღმაშენებლის სახელობის
უნივერსიტეტის რექტორს,

პროფესორ თეიმურაზ ქორიძეს

განმცხადებელი _____
(სახელი, გვარი)

მისამართი _____

ტელ: _____

ელფოსტა: _____

გ ა ნ ც ხ ა დ ე ბ ა

სურვილი მაქვს, სწავლა გავაგრძელო შპს საქართველოს დავით აღმაშენებლის სახელობის
უნივერსიტეტის დოქტორატურაში ბიზნესისა და სოციალურ მეცნიერებათა სკოლაში

სადოქტორო პროგრამაზე _____
(სადოქტორო პროგრამის დასახელება)

სადოქტორო დისერტაციის სავარაუდო თემა (სადოქტორო საკვლევო თემა) _____

_____ (თემის სახელწოდება)

თემის სავარაუდო სამეცნიერო ხელმძღვანელი _____
(სახელი, გვარი)

გთხოვთ, დამიშვათ უცხოური (მიუთითეთ ენა: _____) ენის გამოცდაზე/მილიაროთ სერტიფიკატი
(ასეთის არსებობის შემთხვევაში)

_____ (_____)
(სერტიფიკატის დასახელება) ქულა

ვადასტურებ, რომ ვაკმაყოფილებ დოქტორანტურის დებულებით გათვალისწინებულ მიღების
პირობებს და სრულად წარმოგიდგენთ დებულებით განსაზღვრულ დოკუმენტებს.

პატივისცემით,

_____ “_____” _____ 20____ წელი

განმცხადებლის ხელმოწერა

შპს საქართველოს დავით აღმაშენებლის სახელობის
უნივერსიტეტის რექტორს,

პროფესორ თეიმურაზ ქორიძეს

განმცხადებელი _____
(სახელი, გვარი)

ა ხ ს ნ ა - გ ა ნ მ ა რ ტ ე ბ ა

ბატონო თეიმურაზ,

ვადასტურებ, რომ არ ვაბარებ და არც ვსწავლობ სხვა უმაღლესი საგანმანათლებლო დაწესებულების დოქტორანტურაში (არც უარი მიმიღია სხვა უმაღლესი საგანმანათლებლო დაწესებულების დოქტორანტურაში მიღებასა და/ან ჩემს მიერ შერჩეული თემის დამუშავებაზე).

პატივისცემით,

(სახელი, გვარი)

თარიღი: _____



შპს საქართველოს დავით აღმაშენებლის სახელობის უნივერსიტეტი
 დოქტორანტის ინდივიდუალური (სასწავლო და კვლევითი) გეგმა

დოქტორანტის სახელი და გვარი: -----

სკოლა: -----

სადოქტორო პროგრამის სახელწოდება: -----

სადოქტორო პროგრამის ხელმძღვანელი/თანახელმძღვანელი: -----

დოქტორანტის სამეცნიერო ხელმძღვანელი/თანახელმძღვანელი:-----

დოქტორანტურაში ჩაბარების თარიღი, ბრძანება: -----

სასწავლო კომპონენტი	კურსის სტატუსი	კრედიტების რაოდენობა	დოქტორანტის მიერ კრედიტების შესრულებისთვის არჩეული სემესტრი

1.* სავალდებულო და არჩევითი (არჩევის შემთხვევაში) დარგობრივი სასწავლო კურსები:	1. 2. 3.
--	----------------

სამეცნიერო სტატიების (პუბლიკაციების) შესრულების სავარაუდო გრაფიკი და თემატიკა:

ა) I სამეცნიერო სტატია -----

ბ) II სამეცნიერო სტატია -----

ბ) III სამეცნიერო სტატია -----

2.* სამეცნიერო სტატიები (პუბლიკაციები):	1. 2. 3.
---	----------------

სადისერტაციო ნაშრომის სახელწოდება: -----

სადისერტაციო ნაშრომის მოკლე აღწერილობა:

ა) კვლევის მიზანი: -----

ბ) საკითხის აქტუალობა, სიახლე და მნიშვნელობა: -----

გ) სადისერტაციო ნაშრომის სტრუქტურა: -----

დ) სადისერტაციო ნაშრომის შესრულების (კვლევის) სავარაუდო გრაფიკი: -----

დოქტორანტის ხელმოწერა: -----

დოქტორანტის სამეცნიერო ხელმძღვანელის/თანახელმძღვანელის ხელმოწერა: -----

სადოქტორო პროგრამის ხელმძღვანელის/თანახელმძღვანელის ხელმოწერა: -----

თარიღი: -----

შენიშვნა: 1.*, 2.* პუნქტები ივსება ხელით. არჩევითი დარგობრივი სასწავლო კურსების არჩევის და სამეცნიერო სტატიების (პუბლიკაციების) გამოქვეყნების შემდეგ.



შპს საქართველოს დავით აღმაშენებლის სახელობის უნივერსიტეტი

ანგარიში შესრულებული სამუშაოს შესახებ
(პროფესორის ასისტენტობის შეფასების ფურცელი)

დოქტორანტის სახელი და გვარი: -----

სკოლა: -----

სადოქტორო პროგრამის სახელწოდება: -----

სადოქტორო პროგრამის ხელმძღვანელი/თანახელმძღვანელი -----

დოქტორანტის სამეცნიერო ხელმძღვანელი/თანახელმძღვანელი -----

დოქტორანტურაში ჩაბარების თარიღი, ბრძანება: -----

კომპონენტის ხელმძღვანელი: -----

შესრულებული სამუშაო	დადებითი შეფასება	კომპონენტის შეფასება
სალექციო თემის მომზადება და ლექციის წაკითხვა	8 - 20 ქულა	
ჯგუფთან მუშაობა	5 - 15 ქულა	
შუალედური და დასკვნითი გამოცდების ვარიანტების (საკითხების, ტესტების, კაზუსების, სხვ.) მომზადება	3 - 10 ქულა	
სტუდენტთა ნაშრომების გასწორება	2 - 5 ქულა	
სტუდენტთათვის კონსულტაციის გაწევა	3 - 10 ქულა	
საბოლოო შეფასება (ცალკეული კომპონენტების ჯამის ტოლია)	21 - 60 ქულა	

დოქტორანტის ხელმოწერა: -----

კომპონენტის ხელმძღვანელის ხელმოწერა: -----

დოქტორანტის სამეცნიერო ხელმძღვანელის/თანახელმძღვანელის ხელმოწერა: -----

სადოქტორო პროგრამის ხელმძღვანელის/თანახელმძღვანელის ხელმოწერა: -----

თარიღი: -----

კომპონენტი	საჯარო ლექციის შეფასების კრიტერიუმები	დადებითი შეფასება	კომპონენტის შეფასება
შინაარსობრივი მხარე	სალექციო თემის გაშლა; არგუმენტებისა და ფაქტების მოშველიება; პრიორიტეტების შერჩევა და ლოგიკური გადასვლები; პრობლემაში ორიენტირება; პროფესიული ენით საუბარი; შეკითხვებზე დამაჯერებლად, არგუმენტირებულად პასუხი.	10 - 20 ქულა	
პრეზენტაციის ტექნოლოგია	ლექციისათვის განკუთვნილი დროის რაციონალურად გამოყენება; კონტაქტი აუდიტორიასთან; თემასთან ადეკვატური სლაიდ შოუ და ვიზუალური მასალა; აკადემიური მეტყველება და ლექსიკური მარაგი; საშინაო დავალების მკაფიოდ განსაზღვრა და ლიტერატურის ზუსტად მითითების უნარი.	10 - 20 ქულა	
საბოლოო შეფასება (ცალკეული კომპონენტების ჯამის ტოლია)		20 - 40 ქულა	

დოქტორანტის ხელმოწერა: -----

დოქტორანტის სამეცნიერო ხელმძღვანელის/თანახელმძღვანელის ხელმოწერა: -----

სადოქტორო პროგრამის ხელმძღვანელის/თანახელმძღვანელის ხელმოწერა: -----

თარიღი: -----



შპს საქართველოს დავით აღმაშენებლის სახელობის უნივერსიტეტი
სადისერტაციო ნაშრომის შეფასების ფურცელი

დოქტორანტის სახელი და გვარი: -----
 სკოლა: -----
 სადოქტორო პროგრამის სახელწოდება: -----
 სადოქტორო პროგრამის ხელმძღვანელი: -----
 დოქტორანტის სამეცნიერო ხელმძღვანელი: -----
 დოქტორანტის სამეცნიერო თანახელმძღვანელი: -----
 დოქტორანტურაში ჩაბარების თარიღი: -----
 დოქტორანტურაში ჩარიცხვის ბრძანების ნომერი: -----
 სადისერტაციო ნაშრომის სახელწოდება: -----

შეფასების მეთოდი და კომპონენტი	შეფასების კრიტერიუმები	შეფასება	კომპონენტის შეფასება ქულებით	შეფასების დასაბუთება
წერილობითი/ნაშრომის სახელწოდება	ნაშრომის სახელწოდება ინფორმაციული თვალსაზრისით ზუსტია და ლაკონური; სათაური შეესაბამება მის ტექსტს.	3-5 ქულა		
	ნაშრომის სათაური შინაარსობლივად აცდენილია ტექსტთან. განხილული საკითხები არ შეესაბამება ნაშრომის თემას და სტრუქტურას.	0-2 ქულა		
წერილობითი/სტრუქტურა	ნაშრომი არის კარგად სტრუქტურირებული და იძლევა დასახული კვლევითი ამოცანის გადაწყვეტის საშუალებას. კეთდება აქცენტი ყველაზე მნიშვნელოვან საკითხებზე. უფრო ნაკლები ყურადღება ეთმობა, შედარებით ნაკლები მნიშვნელობის მქონე ფაქტებს. ნაშრომი არის კარგად აგებული და მისი ნაწილები ერთმანეთთან ლოგიკურ კავშირშია. პარაგრაფიდან პარაგრაფზე (ქვეპარაგრაფიდან ქვეპარაგრაფზე) გადასვლა ლოგიკურ ბმაშია. თითოეული პარაგრაფი/ქვეპარაგრაფი სრულად არის განვრცობილი და სხვა.	3 - 5 ქულა		
	სტრუქტურა არავალიდურია. ზოგიერთი პარაგრაფი არარელევანტურია კვლევის მიზნებთან მიმართებაში. დისერტაცია გადატვირთულია არამნიშვნელოვანი, მეორეხარისხოვანი მასალებით. არ იგრძნობა თანამიმდევრობა, ლოგიკური ბმა.	0-2 ქულა		

წერილობითი/ აქტუალობა და შინაარსი	სადისერტაციო ნაშრომი აქტუალურია; დისერტაციაში დასმული ძირითადი პრობლემა/პრობლემები სრულად არის წარმოჩენილი. ვლინდება დამოუკიდებელი მსჯელობის უნარი; ავტორის მიზანი მკაფიოა, არგუმენტაცია ზუსტი, კონკრეტული და კომპლექსურია. ნაშრომი კონცენტრირებულია ძირითად საკვლევ საკითხებზე; აზრი სისტემურად არის ფორმირებული და სრულყოფილად ჩამოყალიბებული. დისერტაციის კვლევითი ამოცანა/ამოცანები სრულადაა გადაწყვეტილი.	8-17 ქულა		
	საკვლევი პრობლემა, თემის აქტუალობა და კვლევის პრაქტიკული მნიშვნელობა არაკვალიფიცირებულად არის ჩამოყალიბებული ან საერთოდ არ არის. ნაშრომში კვლევის მიზნები და შედეგები არასრულყოფილად არის გადმოცემული.	0-7 ქულა		
წერილობითი/ ანალიზის სიღრმე და კვლევის ხარისხი	სახეზეა სადისერტაციო თემის სისტემური კვლევა და კავშირი კვლევის მიზნებთან და შედეგებთან. ეფექტურად არის გამოყენებული კვლევის ადექვატური მეთოდები. ავტორის მიერ ყველა იდეა განვითარებულია. საკვლევი საკითხი შესწავლილია სიღრმისეულად, ამომწურავად. ავტორის პოზიცია გამყარებულია ნათელი და სარწმუნო არგუმენტებით.	10-20 ქულა		
	კვლევის მეთოდები არაკვალიფიციურად არის შერჩეული. კვლევის ხარისხი დაბალია და ვერ უზრუნველყოფს კონკრეტული შედეგების მიღებას;	0-9 ქულა		
წერილობითი/ ნაშრომის სიახლე	მოხდა ახალი ცოდნის შექმნა. დისერტანტის მიერ დარგში შეტანილი წვლილი მნიშვნელოვანია. კვლევის შედეგები დამაჯერებელია. შემუშავებულია საკვლევი პრობლემისადმი ახლებური მიდგომა. არის ახალი მონაცემები ახალი დასკვნებისათვის. დასკვნებში სუსტი ადგილები არ მოიპოვება. დასკვნები ლოგიკურია. დასკვნითი დებულებებისა და რეკომენდაციების პრაქტიკული ღირებულება მნიშვნელოვანია.	10-20 ქულა		
	კვლევის მოსალოდნელი შედეგები არაკვალიფიცირებულად, ყოველგვარი ლოგიკურობისა და დასაბუთების გარეშეა ჩამოყალიბებული. კვლევა არ შეიცავს სიახლეს.	0-9 ქულა		

<p>წერილობითი/ მონაცემთა სარწმუნოობა</p>	<p>საკვლევ თემასთან დაკავშირებული წყაროები, სამეცნიერო და ციტირებული ლიტერატურა, ფაქტობრივი მონაცემები დამუშავებულია სრულად და კრიტიკულად. მონაცემების სისწორე დაცულია. გამოყენებული წყაროები ავტორიტეტულია. ავტორი მონაცემებს იღებს პირველწყაროდან. მოყვანილი ციტატები ტექსტს ერწყმის ორგანულად და მოტანილია შესაბამისი ლიტერატურიდან. ყველა ციტირებული წყარო აღნიშნულია ნაშრომის ბიბლიოგრაფიაში. გამოყენებულია შესაბამისი შინაარსის და საკმარისი რაოდენობის უახლესი პუბლიკაციები. წყაროები სპეციფიკურია და არა ზოგადი; გამოყენებულია უცხოურენოვანი ლიტერატურა.</p>	<p>4 - 8 ქულა</p>		
	<p>გამოყენებული ლიტერატურა მოძველებულია, არარელევანტურია. წყაროები არასაკმარისია. მითითებული ციტირებები ან ფორმალურ ხასიათს ატარებს ან კიდევ არასრულყოფილად არის გაანალიზებული. უახლოესი პერიოდიკა არ არის გამოყენებული. სქოლიოები სხვა ლიტერატურიდან არის მექანიკურად გადმოტანილი. გამოყენებული უცხოურენოვანი ლიტერატურა არასაკმარისია.</p>	<p>0-3 ქულა</p>		
<p>წერილობითი/ აკადემიური წერის სტილი</p>	<p>აკადემიური წერის უნარ-ჩვევები სრულყოფილია. ნაშრომი აკმაყოფილებს სადისერტაციო ნაშრომისათვის დადგენილ აკადემიური წერის სტანდარტებს; კვლევაში სახეზეა მსჯელობის თანამიმდევრული განვითარება. დოქტორანტმა შეძლო ანალიზისა და სინთეზის კვლევაში გამოყენება.</p>	<p>3 -5 ქულა</p>		
	<p>ნაშრომის გაფორმების დონე არაადაკმაყოფილებელია. ვლინდება ენობრივი ხარვეზები. აზრები ბუნდოვანია. აკადემიური წერის კულტურა დაბალია.</p>	<p>0-2 ქულა</p>		
<p>წერილობითი/ მითითება</p>	<p>ციტატები ბრჭყალებშია მოცემული. სქოლიოში მითითებულია შესაბამისი ციტატის ავტორი, თავად ნაშრომის სახელწოდება, გამოცემის ადგილი, გამომცემლობა, გამოცემის წელი, შესაბამისი გვერდ(ებ)ი; პერეფრაზის ან აზრის ფორმირების შემთხვევაში სქოლიოში ზუსტად არის მითითებული შესაბამისი წყარო. მითითებისას</p>	<p>3 -5 ქულა</p>		

	დაცულია დათქმული წესი.			
	მითითების სანდოობა ეჭვს იწვევს. სახეზეა სქოლიოების სიმცირე. ინერნეტ რესურსის გამოყენებისას დაცული არ არის მითითების დათქმული წესი.	0-2 ქულა		
ზეპირი/ პრეზენტაცია, სამეცნიერო დისკუსია	ნაშრომის ძირითადი საკვანძო საკითხები და მიღებული შედეგები სრულად აისახა პრეზენტაციაში; დისერტანტი იშველიებდა არგუმენტებსა და ფაქტებს; საუბრობდა პროფესიული ენით; ჰქონდა გამართული აკადემიური მეტყველება; პრიორიტეტები ლოგიკურად შეარჩია; ჰქონდა ლოგიკური გადასვლები; დაიცვა რეგლამენტი; შეძლო აუდიტორიასთან კონტაქტის დამყარება; გამოავლინა სამეცნიერო დისკუსიისა და კამათის კულტურა; გამოიყენა თემასთან ადეკვატური სლაიდები და სხვა სახის ვიზუალური მასალა; შეკითხვებზე დამაჯერებლად, არგუმენტირებულად პასუხობდა.	7-15 ქულა		
	ვლინდება საკითხის არცოდნა. პასუხები არაა დამაჯერებელია. მსჯელობა საკითხის შესაბამისი არ არის. კვლევის შედეგების განსჯა არაკვალიფიცირებულია. არასათანადოა სამეცნიერო დისკუსიის უნარი; პრეზენტაციისათვის გამოყენებული მასალა არაა დამაკმაყოფილებელია.	0-6 ქულა		
საბოლოო შეფასება (ცალკეული კომპონენტების ჯამის ტოლია)		51- 100 ქულა		

სადისერტაციო კომისიის წევრ(ებ)ის ხელმოწერა: -----

სადისერტაციო კომისიის თავმჯდომარის ხელმოწერა -----

თარიღი: -----